

Landsvirkjun
Háaleitisbraut 68
103 Reykjavík

Reykjavík, 27. febrúar 2020
UST202002-166/H.H.
09.07.01

Efni: Umsókn um leyfi til framkvæmda - Bakkavörn - Háslón í Kringilsárrana

Umhverfisstofnun hefur móttakið umsókn Landsvirkjunar, dagsett 18. febrúar 2020, um leyfi til framkvæmda innan friðlandsins Kringilsárrana.

Kringilsárrani er friðlýstur sem friðland sbr. auglýsing nr. 181/2003. Allt jarðrask er þar bannað, svo og að skerða gróður eða trufla dýralíf. Samkvæmt stjórnunar og verndaráætlun friðlandsins hefur Umhverfisstofnun heimild til að leyfa akstur vélknúinna farartækja og framkvæmdir vegna bakkavarna.

Lýsing verkefnis:

Á samráðsfundi um rannsóknir og vöktun í Kringilsárrana þann 28. nóvember 2018 lagði Landsvirkjun til að gert yrði tilraunaverkefni með allt að 180 m bakkavörn við norðurenda Kringilsárrana. Að fegnu leyfi Umhverfisstofnunar (bréf dagsett 26. apríl 2019 og Fljótsdalshéraðs (framkvæmdarleyfi dagsett 24. maí 2019) var umrædd bakkavörn gerð sama ár. Landsvirkjun óskar hér með eftir leyfi fyrir framhaldi á þessu verkefni og er þar um að ræða 200 m bakkavörn til vesturs upp með farvegi Kringilsár.

Bakkavarnir verða framkvæmdar með gröfu, traktor og sturtuvagni sem fara yfir Kringilsá á vaði skammt ofan við Kringilsárfoss. Bakkavarnir verða unnar frá lónstæðinu og áætlaður framkvæmdartími er 10 daga tímabil í byrjun júlí 2020. Efri brún bakkavarnarinnar mun nema við efri brún bakkans og hafa fláan 1:2. Ekki er gert ráð fyrir að flá niður bakkann heldur verður fyllt að bakkanum með fyllingarefni úr lónstæðinu. Í bakkavörnina þarf um 100m³ af fylliefni, 200m³ síuefni og 400 m³ af grjóti. Allt efni verður tekið úr lónstæðinu en þar er mikið af gröfu efni.

Umsagnir:

Umhverfisstofnun óskaði umsagnar Vatnajökulsþjóðgarðs þann 20. febrúar 2020 vegna framkvæmdarinnar. Umsögn Vatnajökulsþjóðgarðs barst þann 21. febrúar 2020. Í umsögninni kemur fram að þjóðgarðsvörður á austursvæði Vatnajökulsþjóðgarðs geri ekki athugasemd við umsókn Landsvirkjunar vegna framkvæmda við bakkavarnir í Kringilsárrana.

Áhrifamat:

Umhverfisstofnun metur það svo að framkvæmdin sé gerð til þess að draga úr neikvæðum áhrifum á friðlýsta svæðið til langs tíma. Framkvæmdin er unnin úr lónsstæðinu sjálfu svo ekki á að verða neitt rask á bakkanum, það er á friðlýsta svæðinu sjálfu.

Í stjórnunar- og verndaráætlun fyrir Kringilsárrana kemur fram að ef landbrot ógni verulega verndargildi svæðisins skuli gripið til aðgerða í því skyni að stöðva landbrotið. Aðgerðir skulu unnar í samráði við Umhverfisstofnun, að uppfylltum þeim skilyrðum sem stofnunin setur.

Skilyrði:

Umhverfisstofnun veitir Landsvirkjun fyrir sitt leyti leyfi fyrir gerð bakkavarnar í Kringilsárrana á bökkum Háslóns sbr. lýsingu hér að ofan sumarið 2020 að uppfylltum eftirfarandi skilyrðum:

- Hafa skal þetta bréf með í för á meðan verkefninu stendur og kynna fyrir starfsfólki þau skilyrði sem fylgja leyfinu, áður en undirbúningur og vinna hefst.
- Tilkynna skal til starfsmanns Umhverfisstofnunar á svæðinu hvenær undirbúningur fyrir verkefnið hefst og þegar því lýkur með að minnsta kosti sólarhrings fyrirvara.
- Umhverfisstofnun skal tilkynnt um öll frávik við áður útgefna verkefnalýsingu, og eins ef breyting verður á tímasetningu verkefnis eins fljótt og auðið er.
- Virða skal umgengnisreglur sem gilda um svæðið.
- Einungis skal aka þeim tækjum sem notuð verða við framkvæmdina að og innan skilgreinds framkvæmdarsvæðis innan lónstæðisins.
- Gæta skal að mengunarvörnum farartækja og þess gætt að mengandi vökvi berist ekki í jarðveg eða vatn.
- Þess skal gætt við akstur utan vega að hann fari fram á tímum þar sem hann veldur sem minnstu raski á jarðvegi og gróðri.
- Forðast skal óþarfa rask og stærð framkvæmdasvæðis skal haldið í lágmarki.
- Vandað verði við frágang eftir að verki lýkur.
- Umsækjanda ber að tryggja viðhald mannvirkis.
- Óheimilt er að trufla dýralíf.
- Ef upp koma álitamál um framkvæmdina sem tengjast verkefninu og frágang svæðisins skal hafa samband við Umhverfisstofnun í síma 591-2000.

Ef framkvæmdaraðili veldur náttúruspjöllum með framkvæmd í skilningi 87. gr. laga nr. 60/2013 um náttúruvernd getur Umhverfisstofnun t.d. lagt fyrir framkvæmdaraðila að afmá jarðrask og lagfæra gróðurskemmdir eða stöðvað framkvæmdir sbr. nánar XV. kafla laganna.


Ef umhverfisaðstæður á svæðinu breytast getur Umhverfisstofnun skv. 2. mgr. 89. gr. laga nr. 60/2013 um náttúruvernd breytt skilyrðum leyfis, bætt inn nýjum skilyrðum eða afturkallað leyfið til að koma í veg fyrir verulegt, ófyrirséð tjón á náttúru Íslands.

Leyfi landeigenda og/eða sveitarfélags gæti þurft fyrir verkefninu.

Leyfi forsætisráðuneytisins gæti þurft fyrir framkvæmdunum skv. lögum nr. 58/1998.

Sé skilyrðum leyfis ekki fullnægt getur Umhverfisstofnun afturkallað leyfið skv. 1. mgr. 89. gr. laga nr. 60/2013 um náttúruvernd.

Virðingarfyllst


Ólafur A. Jónsson
sviðsstjóri


Arna Hjörleifsdóttir
sérfræðingur